




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2017

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Tōfā Fetu'utu'una'i: O se Meaalofa mai le Atua

saunia e

Reupena Maulolo

Faia'oga o le Faiva Alofilima o
le Mataupu Silisili
Kolisi Faafaifeau i Malua

Manatu Autu:

O le *'tofa fetuutuuna'i'* o se
meaalofa mai le Atua mo le tagata
faatuatua. E manatu a aunoa i le
faaauau itulau e 2

O le 'Api Tusitusi a le Fafine Talitane na Anoanoa'i lona Alofa mai le tusi: THE DAY I MET JESUS

(O le Aso na ou Feiloa'i ai ia Iesu)

faaauauina itulau e 12

O le Teine e Leai se Isi e Mana'o iai

O le Tala ia Iakopo, Rasela, ma Lea
(Kenese 29-30)

silasila itulau e 5

O LE ATA: Ua mavae ia mea, ona tofotofo
lea le Atua ia Aperaaamo, ua faapea mai ia
te ia.....'Ia e ave lou atalii, o lou atalii e
toatasi, o le ua pele ia te oe, o Isaako lava,
ma e alu i le nuu o Moria, ma avatu ia te
ia e fai ma taulaga mu i lea mea.....Ua ave
foi e Aperaaamo le fafine e fai ai le taulaga
mu, ma faaee ai ia Isaako lona atalii, ua
ave foi e ia i lona lima le afi ma le polo
(naifi), ona o ai lea o i la'ua. Ona fai atu
lea o Isaako i lona tama....., Lo'u tama e,
faauta, o le afi ma le fafine, a o i fea se
tama'i mamoe e fai a'i le taulaga
mu?.....Ona tali lea o Aperaaamo, 'Lo'u
atalii e, e aumai e le Atua se tama'i mamoe
mana e fai a'i le taulaga mu...' ona faia
lea e Aperaaamo o le fata faitaulaga i lea
mea, ma faaafu le fafine, ua na fusifusi foi
lona atalii o Isaako, ma faaee ia te ia i le
fata i luga o fafine. Ona aapa atu lea o
Aperaaamo lona lima i le polo, o le a fasioti lona atalii. Ona valaau ifo lea o
le agelu.....mai le lagi, 'Aperaaamo e.....soia le oo lou lima i le tama, aua foi
e te fai se mea e tasi ia te ia, aua ua ou iloa nei ua e mata'u i le Atua, ina ua
e le taofia lou atalii, o lou atalii e toatasi, a ua e tuu mai ia te au.'"



O Avanoa e

Faaosoosoina ai

O taeao uma lava i le tusa o le ta
tonu o le 'afa o le itula e valu, ou
silasila itulau e 10

Ua Pa Le Lauaitu

Na ou fanau i Leusoalii,
Luatuanuu, 80 ma ona tupu
tausaga talu ai. O le nuu lea e sili
ona tele mea ou te manatua ai i lo'u
faaauau itulau e 15

Tofa Fetu'utu'una'i: O se Meaalofa mai le Atua

mai le itulau muamua

tagata lea meaalofa, ona feagai loa lea ma faafitauli ma lu'itau o le ola. O le upu *tofa fetuutuuna'i* e pei ona faamatalaina e Tupua Tamasese Efi e faapea: "O le tofa, o le moe lea a le tamalii." O lona uiga, e le moemoenoa le tamalii ae tofa manatunatu. E ta'oto ma tatalo le leoa i ona atua ma 'ilamutu e fesoasoani mai, aua se tofa manino, se tofa potu, a o se tofa 'ano'anoa e fofu alamea i to'atuga ma faafitauli o loo moomia ai lana tofa.

O le faamoemoe o lenei pepa, ia fetufaa'i ma sufia lagona ma finagalo i le taua o le *tofa fetuutuuna'i* i le va tua'oi tagata, ma le va tapuia o le tagata ma le Atua soifua. Tatou te vaai foi i le taua o lenei meaalofa i le fofoina o faafitauli alia'e mai le va feagai ai o 'aiga, nuu, ma le Ekalesia. Fai mai Tofaeono Tanuvasa Tavale: "*O le tofa fetuutuuna'i e nofo lelei ai aiga, nuu, aemaise o le Ekalesia.*" Ua mafai foi ona faalateleina le uiga o le *tofa fetuutuuna'i*, i le toe faasoa mai a Tupua Tamasese e faapea:

"O le tofa ma le moe, e uiga uma i le upu '*moe manatunatu*'. O upu uma nei e faauigaina i le moe: I lona aoao tetele, o le tofa ma le moe, e mafai ona faasino i le finagalo poo le manatu o le alii ma le tulafale e faaosofia i le la *moe manatunatu*. Ao *moe manatunatu*, e tatala atu le lotu, mafaufau, ma le agaga o le alii poo le tulafale i ona atua ma agaga o ona tuua, e fesoasoani mai i ni faaiuga talafeagai ma le tonu, aua se tofa ma le moe, i mataupu tuga ua alia'e i le lotoifale faale-aiga tainane le

afio'aga (2008, 133).

O le tofa a le tamalii anamua sa faama'itea i lona fesoota'i atu i ona 'ilamutu ma ona feoi. O lona uiga, e maua e soo se Kerisiano lea meaalofa (*o le tofa fetuutuuna'i*/reflective wisdom) ina ua tatala atu le lotu, mafaufau, ma le agaga e aiaina e le Atua. O le taula lea o le soifua faatuatua o le tagata Kerisiano, e tatalo ina ia tapasaina e le Agaga o le Atua. O lea ua faatauaaina vaega ua ta'ua i luga e faalatele ai le taua o le faaoloina o le tagata Kerisiano i le *tofa fetuutuuna'i*, o se meaalofa mai le Atua ina ua talitonu ma faalagolago atu ia te ia.

Va tua'oi tagata

I soo se tafa o le soifuaga, ua tuumatamaga uiga ma aluga, e fai ma tua'oi, i le va o tagata. O le tua'oi i le va o matua ma fanau. O le tua'oi i le va o le matai ma lona 'au'aiga, le va tua'oi o le tuagane i le tuafafine, faapea foi le va tua'oi o le faifeau ma le aulotu. O va ma tua'oi ia e faamemelo ma tausi mamalu i ai soo se tagata. Aua e oia loa va ma fesopoa'i tua'oi nei, ona mapuna a'e lea o feeseesea'iga i mafutaga. Lea e pei ona saunoa Tupua Tamasese Efi: "E tutupu maseiga ina ua fesopoa'i ma le femalamalaa'i i tua'oi. O maseiga foi e tutupu ma alia'e mai, ina ua lofia i le feitaga'i tagata." (2008,109).

E talitonu le manatu o le tofa fetuutuuna'i a le tagata i le va fesoota'i ma le isi, e alia'e ai le filemu, le lotu faamagaloma le fealofaniga i mafutaga. O lona uiga, e maua le filemu ma le sa'olotoga, ina ua faa'ofuina le

tagata i le *tofa fetuutuuna'i* e fetala'i ai lona finagalo, e amana'ia ai ma faaaloalo i le va ma le isi tagata. Fai mai foi Fereterika Nokise, o le upu *tofa fetuutuuna'i* e faauigaina i le potu. O le potu lea e faatonufoalauina le tagata ina ia tatala atu le lotu, mafaufau ma le agaga i le ta'ita'iga a le Agaga Pa'ia, e tapasaina ai le soifuaga i ala uma lava.

I le va tua'oi tagata, ua iloa ai o le tofa fetuutuuna'i e mafai ai ona tupu uiga alofa, faaaloalo, lotu maulalo, faamagaloma le faapalepale i le va ma isi tagata, tusa lava pe satia i peau laga vale ma le mau lu'itau o le ala. I lea lava foi mafaufauga, ua saunoa ai Aiono Fanaafi Le Tagaloa e faapea:

"E talitonu lava le aganuu a Samoa, o le loloto o le soifua fefaasoa'i ma le ola fesufia'i i le filitagagaina o tonu ma fuafuaga mo le lumana'i, o se faiga taua tele lea. Aua o faiga filifiliga e faatauaaina ai le tofa tatala a tagata ta'ito'atasi, ina ia maua ai se maliliega autasi ua finagalo iai."

O lona uiga, o le talanoa ma fetufaa'i, o se faiga sili lea ua atagia ai pulega lelei ma le maopoopo, aemaise lava i faaiuga fai i 'aiga, nuu ma le atunuu, ae tainane le Ekalesia.

Va tapuia o le tagata ma le Atua

E ui ina taua o va tua'oi tagata, ae manatu e sili atu ona matua faatauaaina le vatapuia o le tagata ma le Atua soifua. Aua o le va tua'oi e totogo a'e ai le tofa poo le potu e mafai ai ona fetala'i, e mamalu ai le va tagata, faapea le *faaauau itulau e 8*

O LE LAUGA

Tusi Faitau: Mareko 5: 1-20

Matua: Mareko 5: f19:

“Alu atu ia oe i lou fale, i lou aiga, ma ia e ta’u atu ia te i latou mea tetele ua faia e le Alii ia te oe, ma lona alofa ia te oe.”

Manatu Autu: O le CV poo le Talaaga o le Ulua’i Misionare o le Tala Lelei.

E tele lava ina tatou manatu, o soo e to’a sefulu ma le lua, o i latou ia o uluai misionare o le Tala Lelei o le Faaolataga. Fai mai foi isi, o le fafine Samaria na alu e utuvai i le vai’eli, na oo ina tatia’i ai ana faguvai ae tamo’e e tala’i atu le tala i le tagata ua ia faamatala ana mea lilo.

O le fesili, o ai le uluai misionare o le Tala Lelei? O ai le ituiga tagata na filifilia e Iesu e fai ma ulua’i misionare o le Tala Lelei? O se tagata na a’oa’oina lelei? Poo se tasi sa lelei se la mafutaga ma Iesu? Poo se soo sa mulimuli ma le faamaoni ia Iesu?

‘A ‘e fia sailia le tagata lea, aua e te su’ea i igoa o le ‘au aposetolo, aua e maumau ai lou taimi, aua e te le maua ai. Ae faapefea soo e to’a fitusefulu ma le lua na auina atu e Iesu? Leai. Ae a se isi o latou na tusia tusi a le ‘au aposetolo? Leai foi. A o le’i taitai ona tusia e Paulo ana tusi, a ua leva ona laugaina le Tala Lelei e le tagata lenei.

O fea na sa’ili iai e Iesu lana ulua’i misionare? Na saili i tagata lolotu o Iutaia? Poo tagata popoto na lelei lo latou a’oa’oina i mataupuu silisili tau i le Atua? E leai. Pe na saili i aiga iloga o Iutaia leaga o le Tala Lelei o le Faaolataga le mea lea o le a fai e mana’omia ai ni tagatanuu e popoto i le mataupu

silisili? E leai!

E le taumate e te le talitonu pe a ou fai atu - na sa’ili i fanuaoti! E mata’utia le mea e su’e iai tagata faigaluega a le Alii le Faaola. E su’e i le fanuamaliu.

O ai le uluai misionare na ia maua mai i le fanua e tanu ai tagata oti? E te le talitonu foi pe a ta’u atu - o le vale! O le tagata e leaga le ulu. O le tagata e le atoatoa le mafaufau. E maua lona tala’aga i le tusi a Mareko mataupu e lima. O le ituiga tagata lea e apoapoa’i atu lou tina ia te oe e te ‘alo ‘ese ai, ne’i fasioti oe.

A o le tagata lea na avea ma uluai misionare o le Tala Lelei. O le Vale!

Na le iloa e le nuu o Palesitina pe o le a le mea a fai iai. E ui ina saisai ona vae ma lima i filifili u’amea, ae nofo ma tamotu. E nofo foi ma tasaei ona ofu, ma tasele lona tino i maa maamaa’i. E leai ma se tagata na mana’o iai.

Vagana Iesu! Vagana Iesu!

I nei aso ma vailaau ua tatou maua, e ono umi lava ni aso e tau togafitia ai le ituiga ma’i lea, le tagata e le atoatoa le mafaufau. Peitai, na o ni nai sekone na togafitia ai e Iesu ae malosi.

Fai mai le tala o le vaa o le ‘au soo na tuta atu e latalata i se fanuaoti e iai ma se lafu puaa, o

ni mea e le mama i tu ma aganuu a tagata Iutaia. E afio mai Iesu mai le vaa, ae vevesi mai le vale lenei mai se ana i le fanua maliu. E ve’uve’ua le laulu ma tafetotoi ona lima. Toetoe lava a leai se lavalava. O loo ‘e’e ma alaga leotele ma tasi’i solo ona lima. Ua faaletonu le ‘ausoo ma tau toe feosoi i le vaa. Ua fefefe.

Ae le’i fefe Iesu. (Faitau le tusi o Mareko 5). O le a tatou maua i le mataupu lea le fetaia’iga lilo a le alii ma temoni, na oo ina aliali i mea na tutupu. (f.8: Aua na fetalai atu o ia ia te ia, “Alu ia i fafo i le tagata, o oe na, le agaga leaga.”

Fai mai le fuaiupu e 7: Ua alaga mai foi o ia ma le leotele, ua faapea mai, “Se a lau na ia te au nei, Iesu e, le Alo o le Atua Silisiliese?” Ua ta’utino e le tagata o Iesu o le Alo o le Silisiliese.

Na finagalo Iesu e toe fo’i mai le tagata i le lelei. Ma e le’i iai se malosi o temoni e toe taofia ai. A fetalai mai le Atua, e leai sa latou mea e mafai ona toe fai. Ua latou aioi mai foi ia te ia, ina ia na le aueseina i latou i lea nuu.

O le tula’i atu o Iesu na fefefe ai temoni. E ui lava na latou pulea le tamaloa i ni aso se tele, a o lea ua matata’u i luma o le Atua, ma ‘ai’oi ina ia alofagia i latou. Na manatu foi temoni e saogalemu i latou pe a o atu i le lafu puaa, i lo le faafeagai ma le Atua. Na talia e Iesu le latou talosaga, ma auina ai i latou i le lafu puaa e lua afe lea na tulioso i le vai ma malelemo ai.

Ae leai ma se mea a le ‘ausoo na faia, na o le faataupupula, a

faaauau itulau e 4

O LE LAUGA

mai le itulau e 3

o faia le galuega e Iesu.

O tatou foi a tatou oo i se tulaga faapea i lo tatou olaga, tatou faia le mea na faia e le 'ausoo - o le 'aia le faalavelave i le taimi e faia ai e le Atua le galuega e le mafai ona tatou faia.

O le a le mea na fai e i latou e ona lafu puaa? (f.14): "Ona sosola lea o e sa fagina puaa, ma tala atu ai i le aai ma ona faoa'a'ai, ona latou o mai lea e matamata i le mea ua faia." Ua o mai tagata e matamata i galuega mamana ua faia.

(f18) - Ua maliu a'e o ia i le vaa, ona aioi mai lea ia te ia o le na uluitoina ina ia la faatasi ma ia. O lona uiga, ua lelei le ulu o le vale. Ua te'a le valea. Ua talitonu ia Iesu.

A o Iesu ua le mafai, a ua fetalai atu ia te ia, "Alu atu ia oe i lou fale, i lou aiga, ma ia e ta'u atu ia te i latou mea tetele ua faia e le Alii ia te oe, ma lona alofa ia te oe." Ua alu foi o ia, ma na tala'i i Tekapoli o mea tetele ua faia e Iesu ia te ia, ona ofo ai lea o tagata uma.

O le fe'au faamisionare lea, ua valaauina ai e Iesu le vale sa nofo i le fanuaoti, na te faia.

E le'i mana'omia e Iesu se CV o le tagata lea, poo se tusi mai se mea sa faigaluega ai e pei ona masani ai, poo sona lipoti mai se faifeau, aua o lea ua silafia e Iesu, o le tagata e nofo i le ana i le mea o iai fanuaoti. O le tagata foi e valea. E tasaei ona lavalava; e tauvalaau solo; e nofo ma tamotusi filifili uamea sa loka ai ona vae ma lima. E

fefefe ai tagata. Ona pau lea o mea o sona CV pe a fai.

A o lea ua filifilia e Iesu e fai ma misionare o le Tala Lelei. Se Tala Lelei ina a uiga ese ma le tuu i le tagata sa valea na te amata tala'iina! PAUSE!

Ua faafia ona filifilia e le Atua tagata le taualoha e fai ma ala mai o le Faaolataga mo tagata? Le Au Soo e to'a sefulu ma le lua, na o le fai faiva le mea latou te iloa, ma le fonofonoina o masae o o latou upega fagota. E le'i o i ni kolisi e pei o Malua ma Piula e su'e ai ni o latou MA ma ni Ph.D. A o lea ua fiifilia e Iesu e latou te tala'iina le Tala Lelei o le Faaolataga. Raava le fafine talitane ma le fu'a mumu na ia sisi i le faamalama ina ia sao tagata Isaraelu. O ia o se tasi o le gafa o le Alii le Faaola. Ruta le teine Moapi, o le nuu faapaupau a ua taamilo mai ai le gafa o le Alii Faaola. Patisepa le fafine mulilua a ua ui mai ai le gafa o le faaolataga, ma le alofa tunoa o le Atua. Le fafine Samaria na tatia'i ana fagu utuvai i le vaieli ae tamo'e e ta'u atu i le nuu le Alii ua ia faaali atu ia te ia ana mealilo, ma fesili, pe le o le Mesia ea lea? Ma le 'au Maria, e iai Maria le tina o Iesu, ma Maria le fafine talitane na ia uu le Alii i le uu nato tautele, ma solo vae o le Alii i lona lauulu, o se mea e le tatau ona faia e se teine amio lelei i lona lauulu.

Faitioina John Key le sa fai ma palemia o Niu Sila, i lona loteina o le lauulu, poo le fili a le teine i se fale'aiga na asiiasi iai. Ona o le lauulu o le teine, o

se vaega o lona mamalu e ta'i fia itula o taselu ma teuteu ma faamanaia. E le soona loteina e se isi vagana lona tina, ma lana tane, ma ona tei. A o lea ua loteina e le palemia o Niu Sila. Le laulu lea ua faaaogaina nei e Maria e mulumulu ai 'a'ao o le Alii lea ua fetafea'i ai le uu sausau manogi ma le taugata. Ma fetalai ai le Alii, soo se mea e oo atu iai le Tala Lelei, e oo atu foi iai le manogi o le mea na fai e Maria le fafine talitane ua faamagaloina e le Alii Faaola.

O le taulaga o le faamamaina o agasala a le lalolagi, a ua aumai iai fafine leaga, talitane, e fau ai le togafiti. Aua o tagata sa leaga a ua lelei. Tafefe! O le fofu alamea lea a le lagi. O le fofu alamea lea a le lagi, ma le alofa tunoa o le Atua. Le tagata na pa'u i Etena, lea ua fofu alamea ai le Atua. Ua aumai lava le tagata e faaali ai lona alofa ma lona mana toe faalelei.

Le 'au faatuatua e, aua e te manatu mama i lou tagata ma mea e mafai ona faaaogaina ai oe e le Atua. Poo le a lava le taleni oi ia te oe, pe leai foi, e iai lava le vaega e faaavanoaina mai e le Atua, e te faia mo ia. E silafia lelei e le Atua lou tagata, ma le mea e te aoga iai mo ia.

Aua tatou te manatu mama i nai mea iti, poo nai taleni, o loo ia i tatou. Aua o nai nutinamea na e faalalopo'a e le Atua, ma na faaaogaina mo lana Tala Lelei o le Faaolataga mo tagata uma. Amene.

Saunia e Afemata

Tunumafono Apelu Aiavao
(O le lauga e sui ai le lauga faatonuina e le'i taunuu mai)

A Page for Youth
ITULAU MO TUPULAGA TALAVOU

O le Teine e Leai se Isi e Mana'o iai

O le Tala ia Iakopo, Rasela, ma Lea
(Kenese 29-30)

(Mai le tusi: “O le Tala o le Alofa o le Atua mo Oe”).

I aso lava la ua leva, sa iai se auuso teine e to'alua. O le uii, e igoa ia Rasela ma o se teine matua lalelei lava. A o le teine ulumatua, e igoa ia Lea, e le aulelei. Fai mai foi nisi tagata e toatele, o Lea e matua auleaga lava.

O Rasela o le ituaiga teine lea e valaaulia pea lava pea i ni pati poo ni aiga, poo ni faatasiga ona o lona aulelei. E leai ma se isi e le alofa ia Rasela. A o Lea, talofa e, e leai ma se isi na te amana'ia ona o lona auleaga.

O se tasi aso na asiasi atu ai lo la kaseni, (cousin) o Iakopo, o se tasi o atalii o Isaako, o loo solasola ma le aiga ona ua gaioi, ma fai togafiti leaga ma oo ina itagfia ai e nisi tagata, e aofia ai ma lona uso, o le ala lea o le solasola ma lafilafi solo.

A o le mea malie, o Iakopo, o ia lea na folafola iai e le Atua, le folafolaga lava lea e tasi na tuuina atu e le Atua ia Aperaamo le tama o lo la tama - 'O le a ou lavea'iina le lalolagi ona o lou 'aiga'.

Ona nofo ai lea o Iakopo mo se taimi umi ma tautua mo Lapana, le tuagane o lona tina.

Ua oo i le isi aso ona fai atu lea o Lapana, "Iakopo, ua ou manatu e totogi oe mo le galuega tele ua e faia i nei tausaga e tele sa tatou nonofo ai. O le a se mea e te mana'o iai?" Na oso a'e i le mafaufau o Lapana le manatu. "Ae

a se isi o la'u fanau teine?"

Na vaai atu Iakopo ia Rasela, ona toe vaai atu ai lea ia Lea. O ai nei o le a ia filifilia? Ia, ua filifili e Iakopo le lalelei o Rasela.

:"O le a ou faigaluega ia te oe mo tausaga e fitu e leai se totogi,, pe a ma faaiipoipo ma Rasela."

Ona faapea lava lea ona fai se'ia oo i le aso e faaiipoipo ai.

A o le po lea malama le taeao faaiipoipo, na fai ai le togafiti a Lapana. Ua ia le auina ia Iakopo ia Rasela, a ua tuli iai Lea le uso auleaga. Ia, o ia aso, e leai se eletise, o le mea lea, sa pogisa lava totonu o le fale'ie. Ma le isi mea, sa fai ufimata o teine e faigata ai ona iloa lelei atu o latou mata. O le mea lea na le iloa ai e Iakopo le togafiti ua fai e Lapana.

O le taeao na sosoo ai, na ala a'e ai Iakopo ma vaai atu, oi se mala paga, e le o Rasela a o Lea, le teine auleaga, lea na la momoe! Na tu a'e i luga Iakopo ma tauvalaau leotele, "Lapana, lou faitogafiti leaga!"

Ae tali mai Lapana, "Galue mo a'u mo le isi fitu tausaga ona lua faaiipoipo ai lea ma Rasela."

Ona toe galue ai lea o Iakopo mo Lapana mo le isi fitu tausaga, seia oo ina avea Rasela ma ana ava faaiipoipo. Peitai, o ana ava ia e toalua, o le auuso, e matua sili atu lona alofa ia Rasela i lo Lea.

Fai mai Lea, "E leai se isi e alofa

mai ia a'u, ona o lo'u auleaga!"

Ae le'i faapea le silasila a le Atua. E le auleaga Lea i lana silasila. Ma ina ua ia silasila mai e le alofa se isi ia Lea, e le mana'o foi iai se isi, ona ia filifilia ai lea o ia, ma alofa faapitoa iai, ma tuuina atu ai ia te ia se galuega taua.

E iai le aso, o le a lavea'iina ai e le Atua le lalolagi uma, e auala mai i e tupuga mai ia Lea. O le mea lea, ina ua iloa e Lea e alofa le Atua ia ia, ona oo ifo ai lea i lona loto le manatu, e le afaina pe sili ona alofa atu o lana tane ia te ia, pe aulelei foi pe leai. E le afaina, o lea ua filifilia o ia e se isi, o lona uiga ua iai se isi e alofa ia te ia, i se alofa E le Uma, i se Alofa e le Fiu, e le Malepelepe, o le Alofa e Faavavau.

O le mea lea ina ua fanau Lea ma maua sana tama tama, ona ia faaigoa ai lea ia te ia o Iuta, o lona uiga, "O le taimi lenei o le a ou vivii ai i le Alii!" Ma o le mea lenei na ia faia. E te le mate'ia le galuega na fuafua e le Atua mo Lea. O le mea moni, ina ua silasila atu le Atua ia Lea, na ia iloa atu ai se purinise. Ma o le mea moni lenei na tupu. O se tasi o le fanau a le fanau a Lea, o le a avea ma perenise - le Perenise o le Lagi - o le Alo o le Atua.

O le Perenise lea o le a alofa i tagata o le Atua. E le tau avea i latou ma tagata aulelei pe lalelei ina ia fai ai i latou ma tagata e alofagia. O le a matua alofa foi o ia ia i latou. Ma o le a aulelei ma lalelei i latou aua e alofagia i latou e ia. E pei o Lea.

On Writing

No writing comes alive unless the writer sees across his desk a reader, and searches constantly for the word or phrase which will carry the image he wants the reader to see, and arouse the emotion he wants him to feel. Without consciousness of a live reader, what a man writes will die on his page

Barbara Tuckman

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

O Ta'ita'i'au e To'alua ma a la Faiga

O Cromwell, le ta'ita'i'au e le'i faia'ina lava i se taua, ua matua alu nei lona mafaufau ia Siasosi Fosi. Ma o soo se taimi lava e fia feiloa'i atu ai Fosi ia te ia, na te talia lava. Ua ia faalauiloa i le itu faa-polokiki mea o loo fai e Siasosi Fosi i le itu faale-agaga. Ou te talitonu o ia tagata e to'alua, e uiga faatasi o la agaga, ma e na aveva lea ma mea e mafana ai le la mafutaga. Sa ia Cromwell le loto toa ma le 'ina'ina e faia ai mea na te manatu e sa'o ma tatau. Ae na fai mai foi o ia, a na faapea e sefulu ni tausaga e toe laitiiti ai, "o le mea moni e leai se tupu i Europa e le gatete ma mata'u ia te ia." E faapea foi uiga ma talitonuga o Siasosi Fosi, ae ese le mea sa faatutu iai lona ola. E fefefe uma lava minisita ma tagata lautele pe a alu atu Fosi i le aai. E iai foi aso e tu ai se leoleo i le tuaoi e taofi Fosi e 'aua le ulufale i le aai pe a fia asiasi atu iai, ona o le fefefe o tagata i faitioga a Fosi.

Ua fai lava ma tusi Fosi ia Cromwell, tusi soo, ma apoapoa'i iai ina ia tu malos i ana taumafaiga e toe fuata'i ia Egelani. O le tusi aupito malos na ia tusia na mafua ona ua ia manatu ua amata faavaivai Cromwell e faatino ana folafolaga e toe fuata'i le Ekalesia.

E ui lava ina faitiaina soo e Siasosi Fosi ia Cromwell, ae sa matua alofa lava iai. E le'i taitai ona maliu Cromwell a ua faaali atu e le Atua ia Fosi o le a maliu, ma o le taimi lava lea na amata ai lona faanoanoa i lea mea, e pei ona faanoanoa se isi i se maliu o se tagata moni o sona aiga.

Na taunuu lava ona maliu o Cromwell, i le tausaga e 1658, e pei ona faaali e le Atua ia Fosi. Na soloa'i ane le atalii o Cromwell o Risati e fai ma ona sui, peitai na te le'i maua uiga toa, finafinau ma le 'ina'ina o lona tama. Na osofa'ia Egelani e Sikotilani ma faia'ina ai Egelani, ma tula'i mai ai e fai ma tupu ia Salesa II (Charles) i le tausaga e 1660.

O ni vai taimi o suiga tetele na feagai ai ma Fosi, faa-polokiki ma faale-agaga. E le gata i fesuia'iga e tele tau i tapua'iga, ae valu ni fesuiaiga i pulega o le malo na feagai ma Fosi. Ma e tofu lava le pule'aga ia ma ana faiga ogaoga na faataatia mo le faafoega o le malo. Ae na manuia ai Fosi i ia fesuia'iga uma.

O le Ulu e le Puloua ma le Isu Tafetotoi

O se tasi o mea e uiga i le soifua o Siasosi Fosi ou te fiafia iai, o le fetai'iga ma se patele na masaa ai le toto. Na tupu i le tausaga e 1652. Na tuua e Siasosi se mafutaga a 'Quakers' ae alu e faafeiloa'i se patele. E masani lava ona avane avanoa ia Fosi e saunoa ai, a o le aso lea, e amata atu ona tautala Fosi, ae savali mai se patele ua ta Fosi i le Tusi Paia. O le malos o le tafe mai o le toto na valia uma ai i le toto puipui o le fale. Ua faasaga atu le patele ua tatu'i Fosi, ma taisi i tusi ma lalalau, ona sii lea ma tog i fafo atu o pa o le fale, ma leiloa ai lona pulou. Ae na toe tu a'e i luga Fosi ma 'ote mai, ma solo le toto mai lona isu. Ona toe faaauau ai lea o lana lauga mai tua o le pa e pei e leai se mea na tupu.

A o le taimi lea ua tete tino o le patele, pei ona tete o tino o tagata Quakers i a latou sauniga lotu masani lea e mafua ai ona faaigoa o 'Quakers' - (quake, quakers). Ina ua vaai atu tagata ua tete le patele, ona talie lea iai ma fai atu, "Vaai o le la ua tete e pei ona tete tino o Quakers. Ua liu Quaker le patele!" Ae na atili tetemu le patele ina ua taunuu atu leoleo e su'esu'e le mea na tupu. Ua fefe ne'i tipi 'ese lona lima ona o lona taina o Fosi. Peitai na faamafanafana Fosi iai ma faamagalo le patele.

E le'i ita Fosi i le sasaina o ia, poo le tafetotoi o lona isu, ae faanoanoa ona ua leiloa lona pulou sa fai ma ana togiga e tete atu ai i le tele o tu ma aga a le nuu ma le lotu.

Ua le Gagana i Luga o Mea'ai a Povi

O le faateteleina o le lauiloa ma logologoa o Siasosi Fosi, o le faateteleina foi lea o lona taumafai e titina lona lauiloa. Ina ua mautinoa o le a lauga Fosi i le nuu, ona tumutumu atu lea iai o tagata e faalogologo. Peitai na manatu o ia ua tosina atu manatu o tagata ia te ia, ae le o le Atua, ona 'a'e ai lea i le tumutumu o le faaputuga o mea'ai a povi (haystack), ma nofonofo ai. Ua tumu tagata ma faatalitali i sana lauga, ae ua le tautala. Ua fiu isi e faatali ona taape lea. Ua lelei lea ia Fosi. Aua na ia lagona, na o mai e faalogologo ia te ia, ae le o le Atua. Ua te'a se taimi umi, ona amata ai lea ona lauga. Ma e na lagona e tagata le oo ifo o le mana ma le Agaga o le Atua ia i latou.

Na salalau tala i lea mea, ma faapea ai tagata, e uiga ese foi lea mea na fai e Fosi. E le'i malamalama latou iai. O le mana'o o Fosi, ia taula'i uma mata o tagata i le Atua, ae le o ia. Afai o ia ae le o le Atua na mafua ai ona o mai, e sili ona 'aua le o mai.

O ana lauga taulu'ilu'i,

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

faapoopo atu iai ma faaaliga na ia vaai atu iai atoa ma ana faaaliga faavalu'aga, na avea ma malosi tuufaatasi na tosina mai ai tagata o Matu o Europa. O le logologoa o lana galuega na tula'i mai ai nisi o ta'ita'i iloga o le ituaiga Kerisiano o Quakers e iai James Nayler, Richard Farnsworth, ma William Dewsbury. O Kerisiano na ta'ita'ia e ia tagata na latou faatupuina ni suiga se tele i matu o Egelani, na mafua ai ona faatusaina i latou i le Ami a Sikotilani. O James Nayler na avea ma lima taumatau o Siasosi Fosi ma aga'iga'i atu lona soifua ina a tai tutusa ma le 'ina'ina ma tauivi ma le le fefe o Siasosi Fosi. O Farnsworth ma Dewsbury o ni fesoasoani faatuatuaina na molimoliina atu talitonuga faa-Quakers i Egelani uma atoa ma isi vaega o Europa. E oo atu i le faaiuga o le 1652, ua taunuu Siasosi Fosi i le sini na ta'ita'iina mai o ia i le fesoota'iga faaleagaga mo tausaga o totoe o lona ola.

Ua Taunuu i Swarthmoor

E le taumate o le mea pito sili ona mata'ina talu mai faaaliga faavae na ia maua i tausaga ua te'a, o lona taunuu atu lea i Swarthmoore.

O le maota i Swarthmoor o le meatotino a Thomas ma Margaret Fell (Tomasi ma Makerita). E mauoloa le aiga ma e lauiloa i le nuu. O Tomasi o se faamasino, tapa'au o se Iunivesite, ma se faipule faitulafono iloga. E faaalologia foi Makerita, ma lauiloa i lona potu ma lona ola tapenapena i le tausiga o lona aiga

ma le fanau e to'a fitu. Ua masani i la'ua i le tali o malo ma tagata malaga i lo la aiga.

O le ituaiga maota lea na mana'omia e Siasosi Fosi. Na uluai asiasi o ia i le maota e igoa o Pendle Hill. E le taitai ona latalata atu iai tagata lautele i lea nofoaga, ona e ufitia soo e le puao, ma e iai le meamaupu'epu'e e lata ane fai mai tagata e tumu i taulaitu.

O femalaga'iga a Fosi i Matu na tau atu ai i le maota o Pendle Hill, ma mana'o ai e 'a'e i le tumutumu. O ina na ia maua ai se faaaliga o se seleselega o tagata ofu papa'e o loo faatalitali mo le Upu a le Atua.

Ua matua fiafia Fosi i lea vaaiga ma atili aga'i atu ai i le itu i Matu e vaavaai i le mea o finagalo le Atua e faia. Ua faalogo o ia i le talimalo lelei o Tomasi ma Makerita i lo la maota, a o lea ua latalata atu lava iai. O le mea moni lava e le'i 'i'ite o ia o le a ulufale atu o ia i se mafutaga faaleagaga a o aga'i atu i le maota i Swarthmoor.

O le felavasa'iga o ala e lata i le maota na fetau ai Fosi ma William Lambit o le faifeau o le nuu e lolotu ai Tomasi ma Makerita Fell. Sa tau fai aga'i uma latou i le maota i Swarthmoor. E taunuu atu iai e le o iai Tomasi o loo malaga i Lonetona. E le o iai foi Makerita. Ona faaulufale lea i totonu o Fosi ma Lambit e tamaiti.

Le Faifeau Pi'opi'o

A o faatalitali Fosi ma Lambit mo le ulugalii, ae aliali ai e le fe'oe'oea'i le to'alua lea. Ona e iai le manatu o Lambit o Fosi o se tagata le faatuatuaina na o le ta'u o ia o le Kerisiano ae na te le talia talitonuga faavae mai anamua o

Kerisiano. Ae manatu foi Fosi o Lambit ua matua tumu i mea leaga ma le inosia e le fia tautala iai.

E taunuu atu Makerita i le afiafi lena na te'i i le tau atu ia Fosi, o le ta'ita'i o Quakers i le potu malolo o le maota. E le'i ifoifo pe fai isi tu faaalogo faale atunuu e Fosi i le tama'ita'i, a ua amata faamatala atu le mafuaaga o lona iai i le maota. Sa faalogologo ma le faaalogo Makerita ia Fosi, ona ia valaauina ai lea o ia e fai ma malo i le maota i lena afiafi. Ae toe fo'i Lambit i lona aiga.

Na toe taunuu atu i le maota ia Lambit i le taeao na sosoo ai, ma toe faaauau ai o la fe'ese'esea'iga ma Fosi, a o faalogologo Makerita. Na nofo ai Fosi i le aiga mo ni nai aso. Na faaavanoa e le aulotu se aso e lauga ai Fosi ia latou, ma fuafua e o atu ai ma Makerita. Ae na teena e Fosi.

Ae na alu iai i le taimi o le sauniga ua fesavalai'i i fafo ma faalogologo i lauga o fai i totonu. E tasi le mea na oo ifo i lona mafaufau, o le matua pi'opi'o ma eleelea o Lambit. Na ia lagona le u'una'iga a le Agaga, ona ulufale lea i le falesa, ua oso i luga o se nofoa, ma lauga ma le leo tele i le faifeau ma le aulotu.

Fai mai o ia o loo latou faaagaina upu latou te le malamalama ai, ma latou teena le Agaga moni ma le ola. Ua ia 'ai'oi ina ia latou fo'i mai mai le mea sese o latou faia, ma fo'i mai i le malamalama o Iesu Keriso.

E le'i tupu lava i lea aulotu se mea faapea i aso ua mavae. Ua vevesi le aulotu, a ua valaau mai se isi toaina e pu'e Fosi ma togi i fafo.

Ae na tete'i le aulotu ina ua tula'i Makerita Fell i lona nofoaga faapitoa i le falesa, ma vaai toto'a atu i le aulotu, ma ia faamo'i i le lauga a Fosi. E le'i gagana tagata ona o lo latou faaalogo i le faletua o se tagata iloga ma le faaalologia o le aulotu. A ua faaauau pea le

Tofa Fetuutuuna'i: O se Meaalofa mai le Atua

faaauau mai le itulau e 2

va o le tagata ma le si'osi'omaga ma meaola uma o le foafoaga. O lona uiga, o le va tapuia o le tagata ma le Atua, e pogai ona maua ma mausali, ina ua faalagolago tutasi le tagata i mea uma na te faia, i le ta'ita'iga ma le faatonufofau mai o le Atua. O le va e tapu, o le tuaoi e sa, ma e tatau ona matua manatua pea e soo se tagata soifua i aso uma. Aua o le va ma le tuaoi o loo iloa manino ai le le auga o le tagata ma le mamalu silisiliese o le Atua. O le va foi e maua ai e le tagata le filemu ma le lasi o faamanuiaga; e le gata i le tamaoaga i mafaufauga, a o le soifua atali foi.

Tofa fetuutuuna'i; Fofoina o faafitauli.

Ua nofo ilo i le 'a'ai o finagalo le faaupuga ua tatou masani ai, "O le faafeagaiga o le sui vaai lea o le Atua i le soifuaga nei." O lona uiga, o le faafeagaiga o le sili'aga lea mo le faafileleina o le soifua faale-agaga o tagata. O le faafeagaiga e atoa ia te ia tafa nei o le soifuaga: *naunau, alofa, poto, faautauta, faamaoni ma le fiafia*. O aga ma uiga taua ia faale-tagata o loo faalateleina e Ray S. Anderson ina ua faapea mai:

"O le ta'ita'i magafagafa e tatau ona faaoloaina i itu nei: suiga fou e faatupu faamoemoe; o le malosi e u'una'ia ai, ma le meaalofa o le Agaga Paia e faia ai le galuega tala'i (1997,197)

E atagia i le manatu o Anderson le taua o le *tofa fetuutuuna'i* a le faifeau i le galuega o fitaituga ai. O le tofa a le faifeau e tapu'eina le soifua faale-agaga ma loto o tagata, ina ia tumau i le faatuatua, ma ia tumau i le ola fia auuna pea i le Atua ma lana Tala Lelei.

O loo manino foi i le saunoaga a Taumafai Komiti, o le faafeagaiga Metotisi e faapea,

"A tatou faatuatua ina o tatou tagata lotu, ona tatou lagolagoina lea o le mafanafana ma o le a saga faamausaliina ai sootaga lelei i aulotu ma Ekalesia ta'itasi. O uiga uma ia e atagia i mafutaga ina ua mausali le silafia loloto ma le tofa manino ina ua *teu le va*."

Le va nonofo o le afaigaluega ma tagata lotu, e maopoopo ina ua tausia ma amana'iaina e tagata uma. Le va lea e tatau lava ona tausisia. O le mea moni, e taua tele le *teu o le va* tagata - aua fai mai Paul Tillich:

O le teu o le va o se laasaga taua lea faale-tagata i le galuega

molimau. O tagata soifua e le gata ina fai mafaufau ma malamalama i le taaviliga o le olaga, ae fai foi o latou tino. Faata'ita'iga, tatou te manatua mea - i o tatou mafaufau-ae le gata i lea, e mafai ona tatou galulue, e afu, e 'ata, e tagi foi. E taua ona faalogo, vaai, tofo, pa'i atu, ma taliaina uiga faa-Kerisiano o isi tagata, ina ia aveai ai i tatou ma Kerisiano faamaoni. (Tillich 1961).

I se faaupuga lata mai, *o le tofa fetuutuuna'i* a le tagata e afua ai ona faasoa ma sasaa lagona mo le isi tagata, e pogai ai ona lagona loloto le alofa ma le faapalepale i le isi, ae sili ai ona manino le taga'i i mafatiaga ma faafitauli o loo lofia ai le isi uso a tagata.

Tofa fetuutuuna'i ma aso nei

Afai la o le mau a lena pepa o le *tofa fetuutuuna'i* e faama'itea mafaufauga poto ma le amiotonu, o lona uiga e mana'omia le iai o le tofa fetuutuuna'i i le tagata e fetuutuuna'i ai muniao(6)***, i suiga aemaise o taaviliga o le lalolagi (social changes). I totonu o nei suiga, e tatau lava ona tapena iai le faifeau, ma ia matua atoa iai auupega o le tino, mafaufau ma le agaga e feagai ai ma nei suiga televavave.

O le ituaiga talitonuga lea o loo talanoa ai Greg Ogden i lana tusi o le "The New Reformation". Fai mai a ia: "O le faifeau e nafa ma le galuega tala'i, a o tagata latou te pu'eina ma taofiina lana galuega o loo fai. O le faifeau ua iai le

faaauau itulau e 9

****(6) fetuutuuna'i muniao: O se faaupuga e mafua mai i le faiva o le seu lupe. Soo se tautai seu lupe mata'alia lava e iloa lelei le taimi e fetuutuuna'i ai le muniao ina ia mafai ona matala ma mapuni (se'i tulou) le upega ina ia mafai ona pu'eina ai le lupe.*

O SIAOSI FOSI

O LE NA IA FAASA'OLOTO LE AGAGA

lauga a Fosi. Na fesili o ia pe o latou iloa moni le Atua i o latou loto, pe na o se mea e na ona amioa'i. A ua amata ona maligi loimata o Makerita, ma vaavaai solo i tagata ua leva ona masani ai, ma lolotu faatasi, ma na iloa ai le tele o mea sese o latou fai ia latou tapua'iga. Ua matua tagi nei Makerita ma nofo i lalo, ma na le lagona ai le faai'ui'uga o le lauga

a Fosi. Na toe amata ona tau vevesi le faapotopotoga, ae na iu ina latou ta'ita'iina ma le filemu Fosi i fafo, ma tuu ai o ia i le mea o iai tuugamau. Ma faaauau ai lava e Fosi lana lauga.

mai le tusi:

"God's Generals"

tusia e Roberts Liardon

faamatalaina e

Afemata T. Apelu Aiavao

Tofa Fetuutuuna'i: O se Meaalofa mai le Atua

mai le itulau e 8

tomai faapitoa i mataupu faale-agaga, a o tagata ua na o ni mea fai tino e taliaina le tomai ua sasaa atu e le faifeau, ma e oo iai so latou silafia. E manatu Ogden e tatau ona maualuga atu le silafia e le faifeau nai lo e i lalo o lana ta'ita'iga. E taua le maati o le faaoloaina o le faifeau i le tofa fetuutuuna'i (poto), ina ia lava taoso ai i metotia ma auala talafeagai, aua le faafaileleina o le soifua faale-agaga o tagata o le aulotu. Ia mafa totoga le sa o le faafeagaiga i auala tatau ina ia o gatasi ma mana'oga o le soifuaga ua fetuleni mai. O lea faiga e ese ma le taua ma e mana'omia tele i faiga faa-faapotopotoga (congregationalism).

O le toe tepa la i le aotelega o leni pepa, ua manatu ai e faasoa atu ma faailoa se sao vaivai ma le faatauavaa i le taua o leni meaalofa o le *tofa fetuutuuna'i* mai le Atua, i le galuega o lailoa ai le pa'ia maualuga o le afaigaluega i afioaga ma Ekalesia ta'itasi. O le talitonuga, o le soifua fesufia'i, ma le *tofa fetuutuuna'i*, e afua ai ona manino le silasila i faafitauli ma faafelavei o le ala, e fafauina ai manatu lelei ma le 'anoa, e faama'itea e le Agaga Paia ina ia ola manuia ma fiafia lana fanau.

Tofa fetuutuuna'i (reflective wisdom) ma le Lotu

Agaga Pa'ia = alofa = talanoa/fesufia'i = Tofa fetuutuuna'i

O le poto ma le alofa mai le Atua e afua ai ona faaosofia lagona lelei ma le filemu e faatinoina ai le galuega o faia nei. O le faatinoina foi o le galuega e ala i le *tofa fetuutuuna'i*, e faatupuina ai le soifua filiga ma le to'afilemu e feagai ai ma suiga fou ua alia'e mai i nei aso. O le faamoemoe ua

tuuina atu ai leni ata (model), e le o se manatu e faatonu le pa'ia o sasao nei, a o ni nai motuga'afa e manatunatu filemu i lo tatou valaauina. O leni ata o loo ta'oto ai se feau taua e faamanatu mai ia i tatou uma: A o faatasi tafa nei e tolu i le soifuaga o le tagata, ona iai lea o le tofa fetuutuuna'i; alofa (love, feagaleleia'i (reciprocity) ma le talanoa/fesufia'i (dialogue) = tofa fetuutuuna'i.

Alofa (love)

O le 'alofa' o le ta'ui lea o le tusi apoapoa'i atu o le aposetolo o Paulo i le Ekalesia i Kolose. Aua o lea ua fetaomi atu nei le mau tala'iga sese, ma ua tauau e liua ma taomia ai le ola faale-agaga o tagata o le Ekalesia, aemaise o lo latou talitonuga ia Keriso Iesu. Lea la ua sunu'i tonu lava e Paulo loto o tagata e uiga i le taua o le alofa. Fai mai Paulo: "A o le alofa, e lautua lea i nei mea uma, o le fusi lea e atoatoa ona lelei ai." E manatu le aposetolo e taua le alofa aua o le fusi e aui ma maopoopo ai uiga lelei o soo se Kerisiano. O le alofa e totogo a'e ai le agalelei, loto maulalo, agamalu ma le onosa'i. O lona uiga o upu a Paulo, o le loto ua tupu a'e ai le alofa, e mafai ai ona amana'ia isi tagata. A o le faamamafa foi lea a Paul R. Kolbet e ala i lona toe faamatalaina o mafaufauga o Augustine e uiga i le 'alofa'. Fai mai a ia: "O le alofa e pogai ai ona alu ese le tagata mai le manatu faapito ia te ia lava, ae faasafua atu lona alofa mo isi tagata." E faapena le alofa tunoa mai le Atua, le alofa e afua ai ona faaeaina le tagata, e manuia ai mea uma e faia, ma faatupuina ai le filemu i lona loto, aemaise lona va tua'oi ma isi foi tagata.

Feagaleleia'i (reciprocity)

I le va tua'oi tagata, o loo atagia

ai le taua o le soifua amana'ia ma le ola felagolagoma'i. Pei ona molimau iai Charles Brown Beu i le tusitusiga ua faaigoaina *Mission in the Midst of Conflict*. O lona talitonuga, o le ola feagaleleia'i ma le fefaasoa'i, o se lu'itau mo le tagata Kerisiano ina ia taulamua i le faatuatua ae le o le fefe. Ia lelei faatino le galuega i lona lava lotoifale ma ia tausolomua ona tatou faia o mea lelei, ina ia alofa moni ai i isi uso a tagata. O lona uiga ia le pau mai le soifua faasoa, aemaise lava i le soifua feagaleleia'i. A ia o'oo'o ma pa'i atu le faasoa ma le agalelei i e matitiva ma saisaitia i puapuaga o le ola nei.

Talanoa/Fesufia'i (dialogue) (Efi 2009) O le sufia ma le faamalosi'au i le tagata, e maua ai le saolotoga e faaleoia ai ona lagona. I lea manatu, o loo faatauaina ai le avea lea o le talanoa poo le fesufia'i o se auala e tuu avanoa ai i le tagata vaivai ma le le amana'ia, ina ia faasoa ona lagona i le va tua'oi ma i latou o e taualoa i le lotoifale faale-Ekalesia. O se auala e laugatasia ai tagata uma, ina ua tumua'i tutusa i manatu faasoa.

Aua o le tuana'i, sa malosi ma lauiloa ai le ituaiga a'oa'oga na masani ai o tatou tagata. Le ituaiga aoaoga lea sa faavaeina i le manatu o Paul Freire o le "banking system of education". I lea faiga, e faalagolago ai le tamaitiiti i le tomai sasaa mai o le faiaoga. A o le ituaiga aoaoga lea ua talitonu le au popoto i suesuega faale-aoaoga, e afua ai ona gata ma pau mai le iloa o le tagata. Aua ua na ona matau ma tauloto le iloa ua ofoina e le faiaoga, e aunoa ma ni manatu faasoa atu e faalatele ma

faaaau itulau e 10

A Page for Youth
**ITULAU MO TUPULAGA
TALAVOU**

O Avanoa e Faaosoosoina ai (Unguarded Places)

O taeao uma lava i le tusa o le tonu o le 'afa o le itula e valu, ou te 'u'uina ai le lima o la'u tama a o tatoso ona vae i le musu ma le fefevele e alu i le a'oga faata'ita'i. O taeao uma lava e faapea lava, seia oo ina ma taunuu i luma o le a'oga, ona ou tago atu lea ua fusi

mai, musumusu iai ou te toe alu atu pe a tuua le a'oga ona ma toe o mai. Ona ou tago lea ua seluselu lona lauulu i lo'u lima, ma ou faatofa iai.

E le na o a'u o faia lea mea, i lea taeao ma lea taeao. E toatele foi isi matua e ta'ita'i atu a latou foi

tamaiti e ta'i lima tausaga, a o tatoso foi o latou vae i le mumusu e o i le a'oga. O isi foi tamaiti e fetagisi.

Na faasolosolo ina faaititia le aofa'i o tina ma tama e ta'ita'i atu a latou tamaiti, ona ua le toe fetagisi ua tamomo'e atu lava latou ma o i le a'oga pe a taunuu atu a latou taavale e momoli atu ai. Ua totoe nei na o a'u ma la'u tama o Emi, ma le tamaitiiti o Sefi ma lona tama.

E le alu atu lava se tina o Sefi, a o taeao uma e ta'ita'iina atu ai ia e se tamaloa matua aulelei, 'ofu suti mananaia, lauulu 'ena'ena, tino lelei ma umi, ma lana 'ata'ata e le mafai ona le ta'e ai le fatu o soo se fafine la te fetai.

faaauau itulau e sosoo ai

Tofa Fetuutuuna'i: O se Meaalofa mai le Atua

mai le itulau e 9

faaoloaina ai se fesufia'iga o loo fai. Peitai e taua le faasoa ma le sufia o lagona, ina ia 'oa ma maua ai se maliliega autasi, e faamanino atili ai se mau poo se mataupu o loo sufia ai ni finagalo o tagata uma.

O lona uiga, o le alofa, feagaleleia'i, ma le talanoa poo le fesufia'i, o uiga ma aga ia a le tagata ua tatala atu lona soifua atoa e faatonufoalauina e le Atua. Ta'ua e Celia Deane-Drummonds i lona talitonuga i le 'poto':

O le poto ua aumaia le avanoa i le tagata e iloa ai o le Atua i lona lava poto e faaosofia ai le tagata e valaauina ai, faalogo, ma tatala atu le lotu, nai lo le taumafai e pulea le isi tagata.

O lona uiga, o le *tofa fetuutuuna'i* e mafai ai ona tatou valaauina le toatele ia Keriso. E tupu ai le fia faalogo i leo tau le lagona o i latou o taotaomia, ma afua ai ona tatala o tatou lotu e lagona ai le alofa moni i isi tagata, nai lo le taumafai e faailoa la tatou

pule ma le musua e talia le tuualalo a nisi.

O le atoaga la o lenei atu (model), o le Agaga Pa'ia e lautua i mea uma lava. Aua a aunoa ma le Agaga Paia fesoota'i mai, e le mafai ona tatou faasafuaina le alofa, o le a aunoa foi tatou ma le soifua feagaleleia'i. O le a tatou augatata foi e faatino le soifua fesufia'i ma le talanoa.

I le vaai la faamataupu silisili i le taua o le va tua'oi tagata, ua faatauaaina ai le mau a Brian Hebblethwaite e uiga i le faasoa a Jurgen moltmann i le 'Mataupu Silisili o le faamoemoe (Theology of hope):

“O le faamoemoe o le Kerisiano ia le o le olaga solo lelei, e le o se tamaoaga ua maua poo ni tulaga maualuluga ua ausia i le olaga. Ae peitai ia faasa'olotoina agaga o tagata pologa ma taotaomia, e sili lea ona taua i le silafaga a le Atua e pei ona maliu ai Keriso i le satauro”.

Upu Faaii:

I le atoaga o manatu, e ioeina ai le taofi o le malosi lava o le mana o le Agaga Paia e faaosofia ai le tagata ina ia naunau e faasoa le alofa, feagaleleia'i, ma fesufia'i i finagalo ma talitonuga, ina ia faaosofia ai i le tofa fetuutuuna'i e faia ai faamasinoga tonu ma le sa'o aua le manuia o tagata, a ia faateleina ai pea le viiga o le Atua. E le mafai lava ona fua i fua lelei ma sologa manuia le galuega, pe a aunoa ma le poto mai le Atua.

Afai foi ua maualuga le silafia faa-mataupu silisili, e tatau ona vaavaalua ma le tofa fetuutuuna'i ina ia fai ma auupega sili e tetee atu ai i le fili ma ana 'au. A ia tupoupou pea le alofa, fefaasoa'i ma le talanoa/fesufia'i, o ina e maua ai manatu ma le tofa 'anoa e tua iai o tatou tagata lotu nei ma a taeao. Ia to'ia lenei faapotopotoga i le tofa poto mai le Atua, ina ia saga viia ai lona suafa mamalu i tofi ma nafa ua valaauina ai i tatou.

A Page for Youth
**ITULAU MO TUPULAGA
TALAVOU**

O Avanoa e Faaosoosoina ai (Unguarded Places)

mai le itulau muamua

Toetoe o taeao uma lava, e taunuu faatasi atu ai a ma taavale ma le tama o Sefi e momoli a ma tamaiti. Ma ua oo nei ina ma fo'i faatasi mai le falea'oga aga'i ia ma taavale, i lea aso ma lea aso.

Mai le amataga na ou iloa lava le mafanafana o o'u lagona aga'i i le tamaloa, ma lona fiafia i si a'u tama o Emi, ma lona tago mai i le 'u'u lo'u lima ma fesoasoani mai a o o'u laa atu i luga o se sitepu. I le amataga, e le tele lava ni a ma tala e fai, pei e matamuli le isi i le isi, se'ia oo lava ina le toe taofiofia tala. Sa tuufesili lo'u mafaufau: pe se tamaloa lelei - ioe! E aulelei?

Matua aulelei lava! Tausua ma taufaasee? O le mea moni!

Na oo ina tuufesili o'u lagona e uiga i le tamaloa. ae na ou toe manatu, e leai lava se mea e leaga ai ona ma talanoa. E mama lava a ma talanoaga. Ae na ou toe mafaufau, e pei lava e iai se uiga o lo ma tauvai taunuu faatasi i le taeao e momoli atu a ma tamaiti.

Peitai, ua amata nei ona ou lagona e iai se mea sese o tupu, pe a ma talanoa. Ae sa ou fiafia lava i ona uiga alofa e faaali mai ia te au. Ma nai ana upu e 'ini'ini ai a'u. Na ou fesili ifo, pe ua iai ni o'u lagona lilo mo le tamaloa? O le tali, ua iai! Ae na ou toe manatu

foi, leai, e na o se masaniga. E le umi ae toe mavae, pe alu foi le tamaloa i se isi mea, ma ma le toe fetau ma tutupu a'e ai o'u lagona.

A o se isi taeao, na ou lagona ai e ese le mea lea ua ou aga'i iai. Ua ou vave ala ina ia umi se taimi e fai ai a'u teuga mo, mo ai? I le itula e 7.30 i le taeao!?

Ua ou le toe faafiti nei i lagona ua tutupu ia te a'u i lo ma va ma le tamaloa. Ua osoo tetele lo'u fiafia ma te fetau ma ma talatalanoa, ma ou faalogologo i ana upu suamalie e fai mai ia te au.

Ae na pei ou te te'i mai i sa'u miti i se isi aso. Ua ou tu nei ma ou faapea ifo, Leai! Leai! Leai! E sese! E matua'i sese lava lau mea lea e fai! Ua amata lava ona e tafea atu i le malaia!

O le aso na sosoo ai, ma isi aso mulimuli ane, ua sui ai le taimi ou te taunuu ai i le a'oga e ave Emi. Ne'i ma toe fetau ma le tamaloa.

Ma le isi: Ua ou ta'ua i lo'u to'alua, ma ou aioi iai ina ia alofa ma faamagaloga a'u. Na ou tatalo foi i le Atua mo lana faamagaloga ma ou faafetai i le Alii i lona lavea'iina o a'u mai le leaga semanu ou te oo iai.

tusia e Pamala Kennedy,
faamatalaina e

Afemata T. Apelu Aiavao

"Ua Leai Sa Latou Uaina"

Ua lua oo nei i le aso o le faaipoipoga a lau uo. O le aso ua leva ona lua talatalanoa iai, ma tapenapena foi iai lau uo. Ua iai le faaili, ua uma ona tufa tusi valaaulia, ua uma ona sauniuni le 'aiga, ua iai le faifeau faifaipoipo. Ua iai mea uma lava. Ua oo nei i le itula o le faaipoipoga.

Ae le'i taunuu mai le keke! O fea le keke? O ai na faia?

E telefoni atu i le loomatua na tuu e faia le keke, ua galo ia ia. O le la lava e moe faapea a ia o le vaiaso lea a sau le faaipoipoga. Se

mala paga!

O le ituaiga mala paga lava lea na oo ia Maria le tina o Iesu. Ua amata fiafia o le faaipoipoga, ae su'e atu, ua uma le uaina! O ia vai taimi, o le uaina, o le mea lea e pei o le keke i faaipoipoga i ona po nei. A leai se keke, e le atoa le 'aiga o le faaipoipoga. A leai foi se uaina, e le atoa le 'aiga o le faaipoipoga i aso anamua i taimi o Iesu. O se le mafaufau le le tufaina atu o se uaina i le taimi o le 'aiga o le faaipoipoga.

E oo soo ia i tatou le tulaga

faapea: ua tatou tuai i se fonu, ua misi le pasi, ua galo le tupe i le ofisa, ua oo i le malae vaalele ae su'e atu e le'i avatua tusifolau.

O nai tama'i faafitauli ae a le lelei ona tatou fo'ia, e oo ina pei o se mauga le tele. O le mea lena e tatau ai ona tatou matauina lelei uiga o Maria ina ua iloa ua uma le uaina.

"Ua leai sa latou uaina!" Ua mafaufau lelei Maria i le mea ua tupu. Sa ono oso sona popole pe ita. Pe saili poo ai ua mafua ai ona leai se uaina. Pe faapea foi Maria, 'Ua ou faatamala ua ou le faatonuina se uaina.' Ae leai. Ua mafaufau lelei, maua ai le fofo o le faafitauli, o le Alii. "E iai le mea lea Iesu ua tupu e le mafai ona ou faia." Fai mai le Ioane e 2:3: Ua

faaauau itulau e 15

O le 'Api Tusitusi a le Fafine Talitane na Anoanoa'i lona Alofa mai le tusi:

THE DAY I MET JESUS

O le Aso na ou Feiloa'i ai ia Iesu

mai le itulau muamua

Ua ou iloa se mea e matua malosi ae faigofie. E iai le alofa e sili atu i lo le le aoga, ma agasala e faia i le pogisa o le po. O le mea lea o loo o'u alagaina nei. Ma ua suia atoa ai a'u ona o le malamalama o lea alofa uiga ese. Ae aliali mai pea le ulu o le uiga tuufaafegai o lea alofa - o le mana'ona'o (lust), ma lona malosi na faapologaina a'u i tausaga e tele.

E lua foliga o tamaloloa ou te vaaia pea: i le taimi e le o vaavaai mai nisi, aemaise lava a latou ava, o foliga mana'ona'o; ae a tumu tagata, ona inoino mai lea. Ua ou masani lelei i ia foliga e lua. O le mana'ona'o poo le tu'inaanau, ma le inoino. Na avea ia uiga ma a'u soa i aso na ou ola ai i alatetele. Ma o taimi uma ou te vaaia ai, ou te fia oti ai. Peitai e malosi lo'u fia ola, ou te le fia oti.

O le mana'ona'o o tamaloloa e leai se mutaaga, ma o se mea na faigata ia te a'u ona teena, aemaise lava ona o lo'u mativa.

E iai a'u miti na fai o o'u laitiiti. O se mana'o faigofie lava - ia maua so'u fale ma sa'u tane, ma sa'u fanau fiafia. A o se tasi po na ta'eta'ei uma ai ia miti ma moomooga.

Sa mafanafana le po, manogi fugalaau o le laueleele. Pei ua faafiafiaina lo'u teine muli i le malu o le tau e totogo a'e ai mea, o'u lagona faateine faato'a sefulu lima ona tausaga. O ia lagona ma manogi ua tosinaina a'u ou te savalivali i le malu o le po, savali ese atu i le pisa o uso ma tuagane. I luga o le mea maupu'epu'e, na ou matamata ai i fetu ma le masina,

ma matou sisiva faatasi i lo latou malamalama.

Matua manaia! Shalom! Na o matou ma le masina ma fetu. Ua ou masani i le ta'uta'u atu i le Atua mea oi lo'u mafaufau. o mea o lea na te silafia uma. Ou te mafaufau foi i isi taimi, pe ua 'ou faalavelave soo 'ea i le Sililiese? Ae ua ou manatu foi, a na iai sa'u fanau, ou te matua fiafia e faalogologo i ni a latou tala e fai mai ia a'u. E le taumate lava e faapea le Atua, e fiafia e faafofoga mai i le tele o mea ou te talanoa atu ai ia te ia - o o'u moomooga, o lagona tiga, o faanoanoaga, o le loto mafatia, ma le tele o isi mea.

Na ou tautala leotele i le taimi lea: "Ou te fia iloa pe o a au fuafuaga mo a'u, lo'u Atua ma lo'u Alii. Mata e malosi lima o sa'u tane e fai ai fe'au a so ma 'aiga? Mata e alofa ma faamaoni ia te a'u?" Na tagi le manulele i le taimi lea e peiseai e tali mai ia te a'u.

Ae ou faalogoina loa se gase o le vao, ma ou iloa atu ai se tamaloa. Ua savali mai ia a'u, ma 'ata'ata ma fai mai, "O sa'ili sau tane?" A o le'i faia sa'u tali a ua tago mai ua 'u'u lo'u lima ma toso atu a'u. Ma toe tago mai ua ta'ai'ai lo'u lauulu i lona lima ma tatoso atu a'u. Ua mafuti o'u lauulu ma ou 'e'e ai i le tiga.

Ua te'a se taimi, ona tu lea o le tamaloa i o'u luga ma vaai ifo ma le inoino ia a'u. O loo 'u'u i lona lima lauulu o lo'u ulu, ma fai mai, "Aua e te ta'ua i se isi. Ou te fasiotia oe pe a e ta'ua i se isi le po leni." Na ou talitonu i upu a le tamaloa.

Na ou tagi ma ou fo'i i lo'u aiga

i lea po. Na ou manatu, e leai se mea lilo i le nuu leni. E aliali uma lava mea lilo. O le po lea na faailogaina ai lava a'u o le fafine talitane.

E leai se tamaloa na ou alofa iai, e ui ina tele tupe na ou maua mai ia latou.

Ina ua ma fetau ma se ta'ita'i o le lotu Iutaia na mana'o ia a'u, na ou fai iai, "E tutusa lava ta'ua. E te foliga pa'ia mai i ou la'ei, ae o oe o le tagata matua agasala lava, mana'ona'o ma tu'inaanau. E alu au tupe e maua i le lotu i le totogiina o fafine talitane. Ou te talanoa atu foi ia oe, ae o le mea moni, na o le tupe le mea e taua ia a'u."

Ua iai se mea malosi, se paoa, ua ou maua, o lo'u iloa lea o mea lilo a le 'au fai lotu Iutaia, ma tagata taua o le nuu, na alu a latou tupe i le totogiina o a'u. A ou faaalua, e malepelepe ai o latou aiga.

E tele tupe na ou maua, faatau ai lo'u fale, faatau ai lavalava mananaia, mea'ai na o le tupu na te maua, ma fagu sausau o u'u manogi eseese.

Ae ina ua amata ina sui o'u foliga ina ua aga'iga'i ina ou tagata matua, ona ou mafaufau lea i le moumou malie atu o tupe maua pe a te'a atu lo'u aulelei.

Ui i lea, ua iai la'u inisiua. O le tama'i fagu o le u'u manogi matua taugata, taugata lava, o loo teuina i lo'u fatafata.

E ui lava o au o le fafine talitane, ae sa ou moomoo lava i so'u aiga, ma sa'u fanau. Ma so'u tagata faamamaina. Ua ou toe fia oo i

O le 'Api Tusitusi a le Fafine Talitane na Anoanoa'i lona Alofa
mai le tusi:

THE DAY I MET JESUS

O le Aso na ou Feiloa'i ai ia Iesu

mai le itulau e 12

aso o sefulu ma le lima o'u tausaga. A o le mea ua ou iai nei, ua ou le mama. O a'u o le talitane. E le toe talia a'u e tagata. E le mafai foi ona faamagaloina o a'u agasala e tele na'ua.

Na sui le nuu ou te nofo ai, ua ou alu i Naina, mo se amataga fou. O le tupe na ou teuina na lava lea mo lea taimi. Ua ou ola nei e aunoa ma le galuega sa ou faia muamua. E lava foi a'u tupe o iai e aunoa ma le faaogaina o a'u u'u manogi taugata. Na ou savalivali i le aai o Naina, ma ma fetau ai ma se alii e igoa ia Elekana. Na fai mai a ia, "O faapefea mai oe, tama'ita'i?"

"O loo o'u manuia lava." Ae na iloa mai lava e le tamaloa lo'u fia'ai, ma tago tuu mai ma a'u ni fua se fa o se laau e taatele i le nuu. Na ou fai iai e na o le tolu fua e mafai ona ou totogiina. Ae tali mai, "E avatu le isi a'u fualau e fai ma sefulua'i." Na ou mafaufau, pe mata e iloa e Elekana a'u agasala lilo o lo'u ola talitane?

"E te iloa le mea na ou faalogo iai?" O lana toe fai mai lea ma tago mai i lo'u lima. Na se'i mai lo'u lima, ae fai mai. "Aua e te popole; 'aua e te fefe."

Na ou fai iai, "Ou te fou i le nuu nei. Ua ou le iloa pe o ai a ou talitonu iai."

Na 'ata'ata ma toe fai mai, "Na ou faalogo i le tagata e mafai ona ia faamalolo ma'i e pei o lo'u lima pe lea. E foliga mai o le tagata e fiafia i tagata ua faatagataeseina, tagata ua le amana'ia e le nuu. Ma o loo latalata mai le mea o loo iai. O lona igoa o Iesu le Nasareta. O le tagata faamalolo ma'i. Fai mai

isi o le Mesia."

Toeitiiti pa'u mai i fafo lo'u fatu ina ua ta'u le igoa Iesu. Ae leai sa'u tala na fai. "Ou te talitonu e mafai ona ia faamalolo lo'u lima ua pe. Ma na faamalolo foi loto ua nutimomomo."

Na ou faafetai ia Elekana ona aga'i lea i lo'u aiga. Na ou tau atu i se motu o tagata, o tu ai i le ogatotonu se tagata umi, e seevae ona vae. E foliga i se ta'ita'i o le lotu. Na ou manatua ai i le taimi lea ni tausaga e tele ua te'a, ma se isi fo'i failotu na ou fai iai e tutusa lava ma'ua lo ma agasala. Na ou manatu ifo, mata e le faapea foi le tagata lea e si'osi'o mai e le motu o tagata, e suamalie ana upu ae lililo foi ana agasala e fai?

Na ou faalogo atu o valaau se tagata, "Iesu toe faamatala mai nisi mea mo matou."

"O ai ou te faatusa iai tagata o lenei tupulaga? E pei o tamaiti e taaalo i le malae. E fai ia latou uo, "Na matou pepese i pese o faaipoipoga, ae tou te le sisiva; ona matou pepese lea i pese o tagata oti, ae tou te le fetagisi."

O le a le uiga o upu a Iesu? Na ou toe faalogo atu ua faapea, "E le'i faaogaina e Ioane le Papatiso lona taimi e na ona 'ai ma inu uaina, ona tou fai mai lea, "Ua uluitinoina o ia e temoni." A o le Atalii o le Tagata, na 'ai ma inu, ona tou fai mai lea, 'O le 'ai tele ia ma 'ona ma o le uo a le 'au ao lafoga, ma le 'au agasala.

O le igoa Iesu na ou tu ai ma ou faalogologo, i le fai mai o le uo a le 'au ao lafoga ma isi tagata agasala. Aisea e uo ai le ao lafoga ma le tagata o le Atua? Afai e

moni, mata e talia foi la a'u? Mata e mafai ona ia faamagaloina uma a'u agasala?

Na ou mulimuli ia Iesu i aso na sosoo ai, ma ou mafaufau i ana a'oa'oga. Na fai foi lo'u ufimata ona o lo'u masiasi. Ua matua galala lo'u agaga i ana fetalaiga, e sili atu i lo lo'u mana'o i tupe o lo'u talitane. Mata e moni na te talia tagata ua le amana'ia ma ua faasinoina e pei o a'u? Poo tagata sa ola i le agasala mo tausaga e tele e pei o a'u? E mafai ona faamagaloina moni?

O le Sapati na ou iloa atu ai Elekana o talanoa ma le Alii. O a'oa'o o le tulafono ua finau atu nei ia Iesu e uiga i mea e sa ona fai i le Sapati. Na vaai mai Elekana ia a'u ona faa'ivi mai lea o lona mata. Na ou faalogo atu ua fetalai le Alii ia Elekana, "Sau e tu mai i luma o tagata ia." Ua vaavaai atu Iesu i ta'ita'i o le lotu, o le tasi o i latou ou te iloa lelei lava, ona ua faafia ona mulilua ia te a'u.

"E iai la'u fesili mo outou." O Iesu lea. "E faataga e le tulafono ona fai o galuega lelei i le Sapati, poo le aso lea e fai ai galuega faatevelo? O le aso ea lenei e lavea'i ai le ola, pe faaoo ai le oti?" E leai se isi na tali.

Na vaai atu Iesu ma le alofa ia Elekana, ona toe vaai atu lea i ta'ita'i o le lotu, toe vaai ai ia Elekana. "Tuu mai lou lima," o lana faatonuga lea ia Elekana. Na tuu atu le lima o Elekana, ona papa'i atu lea iai o Iesu i le lima ma tamatama'ilima pipi'o, a o maligi ona loimata. O le taimi lea

O le 'Api Tusitusi a le Fafine Talitane na Anoanoa'i lona Alofa
mai le tusi:

THE DAY I MET JESUS

O le Aso na ou Feiloa'i ai ia Iesu

mai le itulau e 13

na sasa'o ai tama'ilima o Elekana. Ua 'ata Elekana ma tagi ma siva ma faaaliali lona lima ua sasa'o, ma fai mai ia a'u na te fautuaina foi lea faamalologa mo a'u.

Na o lo'u faalogologo i fetalaiiga a Iesu na fai a o nofo o ia i le meamaupu'epu'e. Na vaai mai i le mea o o'u iai ma fetalai, "E faamanuia le Atua ia te outou o fetagisi nei, ma e oo mai le taimi tou te 'ata'ata ai."

Ae na ou manatu ifo, "E faapefea ona 'ata'ata le fafine talitane e pei o a'u. Ua lofia le meamaupu'epu'e i o'u loimata." Ae ua lagona i o'u tino le oo ifo o lea fiafia i lo'u tagata agasala. Ae na toe fetalai: "Faamagalosi, ona faamagaloina lea o oe." Na oso a'e lo'u faanoanoa. E faapefea ona ou faamagaloina le tamaloa muamua na ia faaleaga a'u? E faapefea? A ou vaai atu foi i o'u lima na faitau ai i tausaga e tele tupe o lo'u talitane, ona gatete ai lea o o'u tino.

Elekana? Si a'u uo! O se tagata alofa. Ua fetai iai lona faamaloloina. A o a'u? Ou te le maua se faamagaloga!

A o le taimi lea na sui ai o'u lagona. Ua mou atu lo'u masiasi. Ua mou atu lo'u fefe. Ua ou le toe lagona le 'ele'elea o le agasala a o le faamamaina. Ua ou malamalama nei i fetalaiiga a Iesu ia Ioane le Papatiso ma le mataupu i le salamo. Ua ou malamalama nei i tusitusiga a Tavita, "Ua e faauuina lo'u ulu i le suauu, ua taumasuasua la'u ipu. E moni e mulimuli mai ia te a'u le agalelei ma le alofa i aso uma o lo'u ola, ou te nofo foi i le fale o le Alii i aso e tele lava."

Le Atua o Autau a le Lagi, faafetai tele, na ou tatalo ai. Faafetai i lou faaulufaleina atu o a'u i ou maota, o se afafine e talia ma le fiafia.

Ua ou tu a'e nei i luga, ma ou tagi, ma ou pese, ma ou siva, o se fafine ua faasa'olotoina mai le agasala.

Na ou talitonu, o Iesu na ia faia le suiga lea mo a'u. Ua ou tagotago a'e nei i le fagu o le suauu manogi o teu i lo'u fatafata, ma lo'u iloa lelei o le mea o le a ou faia. O le a ou faaogaina uma le uu manogi e uuina ai o ia, aua ua ia faia mea lelei mo a'u. Ua ia faafouina lo'u ola. O le a le aoga o lenei suauu manogi e lua tausaga o lo'u totogi faato'a atoa lona tau, i lo le uuina ai o 'a'ao o le Alii?

O le aso na sosoo ai na ou tau atu ai foi ia Iesu o siosioina e le motu o tagata. "Afio mai i lo'u fale tatou te 'a'ai faatasi." O le valaau lea a se faresaio. Ua aga atu nei iai Iesu ma le motu lava lenei o tagata e taumulimuli.

Ua ta'o'oto e aai. Ua ou savali atu ma ou faapa'u i ona vae. Na ou mana'o e uuina ona vae i le suauu, a ua ou tagi foi i le taimi lea. Ua maligi ifo o'u loimata i ona vae, e le'i mulumuluina. Afai e mafai e loimata ona mulumuluina vae palapala faapea e le'i mulumuluina, e tatau foi ona mafai ona faamamaina lo'u tagata agasala. O le a ou faia nei se mea e le'i faia lava e se isi fafine talitane: Ua ou sogi i ona vae. Ua ou faalogoina le manavanava tetele o tagata i le ofo i le mea ua ou faia, ae ou te le'i toe popole iai. E leai sa'u solovae mo le galuega o le a ou faia, ae na ou manatua lo'u

lauulu. Ua talatala nei lo'u lauulu, ma amata solo ai vae o le Alii. Ae ou faalogoina le tata o gutu o tagata. E lagona atu lava le magamagagu ma fetautalatalaa'i. A o vae nei ua ou mulumuluina, na savavali atu i tagata ua tele a latou mea ua maumau: o lo latou ola maloloina; o o latou lima ma vae i le ma'i lepela; ma lo latou mamalu. O vae foi nei na aumaia o ia i Naina; ma ta'ita'iina mai o ia ia te a'u. Ua sasaa iai lo'u alofa, ma la'u suauu taugata. E le'i mana'omia e Iesu se mea e tasi mai ia te a'u. Na ona ta'oto'oto ma talia la'u faau'uga o ona 'a'ao. Ona ou toe sogi ai lea i ona 'a'ao. Ua talia e Iesu la'u u'u sasala.

Ua fetalai le Alii, "Ou te fai atu ia te outou, o ana agasala, ma e tele, ua faamagaloina, aua ua ia faaali mai se alofa tele mo a'u."

Na silasila mai o ia ia te a'u ma 'ata'ata. Ma fetalai mai ia te a'u, "Ua faamagaloina au agasala." Ua ou tu i luga, o loo maligi pea o'u loimata. Ae pa'u ai le fagu sa iai le uu manogi, ma ta'e ai. Peitai, o le mea moni lava, ua le toe aoga le fagu; ua uma lona aoga; ua u'u ai 'a'ao o le Alii i le suauu sa iai.

Ua vevesi tagata ma tuufesili, "O ai lenei tagata e fealua'i solo ma faamagalosi agasala?" O ai? O le Atua i le tino tagata! Ona o ia, ua aveva ai a'u le fafine talitane, ma fafine ua faamamaina.

"O lou faatuatua ua e malolo ai." O lana fetalaiiga lea. "Alu ma le Shalom! Alu ma le filemu! Ma le manuia! "

mai le tusi:

"The Day I Met Jesus"

tusia e Frank Viola ma Mary Demuth faamatalaina e

Afemata T. Apelu Aiavao

“Ua Leai Sa Latou Uaina”

mai le itulau e 11
uma foi le uaina, ona fai atu lea o le tina o Iesu ia te ia, “Ua leai sa latou uaina.” Matau mai, na ia mua’i logo Iesu e uiga i le faafitauli, a o le’i logoina se isi tagata. E iai taimi e tatou te manatu ai ‘ai se fiu o Iesu i lo tatou o atu soo, o atu soo ia te ia i lea mea ma lea mea, ona tatou vevesi solo lea ma saili i o ma o, faato’a tatou o ai ia Iesu. Ona tatou faia lea o le mea e faatonuina mai ai tatou. Faalogo foi ia Maria, “O se mea lava e fai mai ai o ia ia te outou, ia outou faia.” E taua le upu lea a Maria pe a tatou mafaufau i le faasologa, poo faasitepu o le liu uainaina o le suavaiauli i le faatonuga a Iesu. Fetalai le Alii, “Ina faatutumu ia o

vai i le suavai.” Ona latou faatutumuina lea, ua oo lava i lau.

Ona tatou oo atu lea i le isi sitepu: Ua fetalai atu Iesu ia te i latou, “Ina asu ane ia, ma ave i le pule i le tausamaaga.” Ona latou

avatu lea o le vai i le pule. Ina ua ia tofo iai, ona iloa ai lea ua liua le vai e fai ma uaina.

O matau mai? Muamua, ua faatutumu vai maa i le suavai. Ona toe fetalai lea o Iesu, e asu le vai, ae le o le uaina, i le pule. O le usitai o auuina na liua ai le vai i le uaina. O le manatu, a tatou le faia le mea o faatonuina ai tatou e le Alii, e le liua le vai oi fagu maa, e avea ma uaina. E asu atu lava o le suavai. O lo tatou usitai e taunuu atu ai le ipu ‘i ‘o ua liu uaina.

Ua Pa Le Lauaitu

mai le itulau muamua

olaga, a o pe tusa o le lima pe ono o’u tausaga. O le nuu e matua tele ai le lupe i ona tuamaota mauga ma le tofea. O le nuu foi sa lauiloa i le faiva o le mata laumei. O le faiva e fai i tua’au i le mea e fafati ai galu. O gatai atu o le fafati o galu o le a’au, e fe’ausi ai le faiva ma autilo mai i vailapa o le a’au o

loo lalafi ai laumei, ona si’osi’o lea e le ‘aufaiva o se laumei ma faatalitali se’i oso atu le laumei e fia sola i le vasaloloa, ona tutu’i lea i se tao ma pu’e ai.

O le nuu foi sa tele ai le fee. E savavali fafine i le aloalo poo le a’au foi e le mamao ma le matafaga, ma so’aso’a lua o fee, ma sii a’e i luga a latou matatao ua tautau mai ai fee ua maua.

O le nuu foi lea faato’a ou faalogo ai i le upu - ‘Ua pa le lauaitu!’ O le maliu mo’i lava na fai i se fale e tusa ma le luaselau iata le mamao ma lo matou fale, a o le maliu o le tina o lo’u tama.

Na fegasoloa’i tagata ma *faaaauu itulau e 16*

Fulufuluina i Loimata

O se isi po na afio atu ai Iesu i le maota o se ta’ita’i iloga o le nuu e talisia ai ona o se valaau na maua mai ai. O lenei ta’ita’i na ia valaauina na o ana uo lauiloa i lona maota.

Ua ta’o’oto nei e taumamafa e pei o tu a le atunuu, ae ulufale atu iai i totonu o le maota se fafine. E le’i valaaulia le fafine, a o le fafine foi, e lauiloa e tagata ona o le faitaaga.

“O le a le manatu o le fafine ua ia soli mai ai le maota? E ese le le mafaufau.” O upu ia a nisi oi le taumafataga. Ona o le fafine, ua lauiloa i le nuu i le agasala ma le amioleaga.

Savali sa’o lava le fafine ia Iesu. Ma o loo ia tauaveina se uu sausau matua manogi lava, ma taugata.

Ina ia silafia, o u’u manogi

taugata i ia aso anamua, e le utuina i ni fagu e masani ai, a o ni fagu e faia i ni maa taugata foi e pei o le alapasa, ma e leai ni o latou tapuni poo ni momono. Ma e tasi la le mea e te faia pe a e mana’o e faaaoga le u’u oi totonu o le fagu, o le tata’e lea o le fagu. A ta’e le fagu, ua masaa uma ai foi ma le u’u sa i totonu. E le faaaogaina lava la e le toatele o tagata u’u taugata oi fagu taugata, ae na o le teu o se mea taua e maimoa pea lava pea iai.

E mafai ona tatou malamalama ai i le uu na alu atu ma le fafine, o lana mea lea e aupito sili ona taugata ma taua ia te ia.

Na tootuli ifo le fafine i tafatafa o Iesu e pei o ia faia i se tupu. Ua ia tago atu i vae o Iesu ua ‘u’u i ona lima ma amata ona tagi. Ua

maligi ifo ona loimata i luga o vae o le Alii, ona ia mulumulu ai lea o vae o le Alii i ona loimata Ua ia sogi atu i ona vae, ma ia solo i lona lauulu ‘u’umi lanu uliuli. Ona ia faia lea o se mea uiga ese, ua ia tata’e le fagu e faia i le alapasa taugata, ma na sasaa le u’u taugata o iai, i luga o vae o le Alii.

Ua tau momole manava a tagata ma faapea ane, “Ua ma’imau le u’u! Ma’imau le u’u ai o vae i se u’u taugata faapea!”

Ae na silasila atu Iesu i le fafine ona ‘ata’ata ai lea. Ona o le mea ua ia faia e matua uiga ese. Pei

faaaauu itulau e 16

Fulufuluina i Loimata

mai le itulau e 15

lava foi ona faia e Samuelu ia Tavita le tupu na filifilia e le Atua anamua anamua lava, lea foi ua faia e le fafine ia Iesu, ae le o le suauu, a o ona loimata.

Na faasea tagata taua ma le lauiloa oi le maota. Fai mai i latou e le tatau ona talia e Iesu lenei fafine ma lana mea ua fai. Na tomumu i latou ma faapea ane, “O le fafine lena o se fafine agasala. O matou tagata lelei oi le maota.” Ma e moni lava foi i latou, aua e foliga mama mai latou, i le itu i fafo. Aua latou te tausia tulafono.

A o Iesu e ati lana silasila i tagata, ma na silafia ai, e le alofofa moni i latou i le Atua, ma tagata. E manatu i latou e lelei i latou, ona latou te tausia tulafono. Peitai o loo tutumu o latou loto i le agasala.

“O le fafine lenei na te iloa o ia o le tagata agasala,” ua fetalai ai

le Alii. “Ua na iloa le tele o ana agasala. Ua na iloa foi na te mana’omia a’u ou te lavea’iina o ia. O le ala lena ua tele ai lona alofa mo a’u. Tou te vaavaai ma le alofa i lenei fafine ona tou te le vaavaai a’e i le Atua. E aliali mea e fai e le fafine; a o mea tou te fai, e lililo i totonu ia te outou.”

Ua femusua’i i le le malilie le ‘au lauiloa sa i le maota, ae liliu atu Iesu i le fafine ma fai atu iai, “Ua faamagaloina au agasala. Ua e talitonu mai ia te au. O le mea lea ua lavea’iina ai oe e le Atua.”

A ua toe femusua’i foi le ‘au lauiloa oi le maota ma faapea ane, “O le a le manatu o Iesu o ai ia? Na o le Atua na te faamagaloina agasala.”

E le’i talitonu i latou o Iesu o le Alo o le Atua.

Take an Interest in Other People

:

You haven’t learned life’s lesson very well if you haven’t noticed that you can give the tone or colour, or decide the reaction you want of people in advance. It’s unbelievably simple. If you want them to take an interest in you, take an interest in them first. If you want to make them nervous, become nervous yourself. It’s as simple as that. People will treat you as you treat them. It’s no secret. Look about you. You can prove it with the next person you meet.

- Sir Winston Churchill, 1874-1965

British Statesman and Prime Minister

Ua Pa Le Lauaitu

mai le itulau e 15

fetagisi, ma ta’u le upu lea, “ua pa le lauaitu” i le maliu o si loomatua. O le maliu lena na ou fefe ai, ona faapea a’u, ai e iai se mea e pa i le fale o fai ai le maliu, ona salalau mai ai lea o ni aitu i le nuu atoa, ma latou tapu’ea tamaiti laiti e pei o a’u.

E umi lava la se taimi a o o’u laitiiti, ou te le tu i se fale o fai ai se maliu, ne’i pa le lauaitu, salalau mai ai aitu ma pu’e tamaiti ma ave.

A o le fale lea na “pa ai le lauaitu”, o ina e sili ona ou manatua ai le isi mea i lo’u olaga tamaitiiti. O le lotu afiafi. Ou te manatua le pese e masani ona usu e lo’u tina ia matou lotu afiafi

Iesu ta’ita’i oe, Ia i matou nei;

Ui ina tigaina, matou mulimuli pea,

Seia taunuu ai, i le nuu lelei.

Faapaolo mai, Ua mu mai le la;

*Ina e fesoasoani, Tausi mai i lou alofa,
E fita na’ua, le ala i luga.*

Iesu tausii mai, i nei ona po;

*Pe a i’u lenei ola, ia taunuu le malaga,
I le nuu lelei, matou mapu ai.*

Ou te manatua foi, o le taimi lava e fai mai ai lo matou tina, “Tatou ifo ma tatalo.” - o le taimi lena e faagaulua ma faapupu’u ai loa le tamaitiiti ia ma moe. Ou te le manatua le amene o le lotu, ae ou te manatua lo’u ala a’e ona o le tapo o a’u e lo’u tina ma fafagu a’u ma fai mai, “Sole! ua a la lou taa lena! Lea fo’i ua e moe e te le’i ta’ele!” Ona sii lea o a’u ma ‘ave i le ta’inamu. O se mea lea ou te manatua pea lava pea ina ua ou matua, ma ou alofa ai i lo’u tina.

O le sii o a’u i lo’u moega ma ‘ote.

O le isi mea ou te manatua i le vai taimi lava lea a o le na o le lima o’u tausaga pe a - o le ‘ulutu’i’ na pa’ulia i luga o le a’au e lata mai lava i le maota o le sa’o o lo matou aiga. E igoa o le ulutu’i ona e matua lapo’a lava le ulu, ae laitiiti le tino. E tusa o le sefulu futu le umi o le i’a.

O le tama o lo matou aiga na ‘a’e e toli mai ni niu e ave i le faiva o le mata laumei, ae na te iloa atu ai le i’a o pa’ulia mai i le a’au. Na o atu taulele’a fasi le i’a ma sai i maea ma toso mai i uta. Ou te manatua na ou ofo ina ua pena le i’a ae maua mai ai ulasami atoatoa. Ae le’i nofonofoia le mea ina ua salalau le manogi o mea’ai sa i le manava o le i’a.

E le’i oo se mata laumei a taulele’a, a ua vaevae le i’a ma tufatufa i aiga o le nuu.

tusia e Afemata Tunumafono

Apelu Aiavao